

四庫全書

經部

欽定四庫全書

尚書全解卷十六

宋 林之奇 撰

太甲上

商書

古者簡冊以竹為之編次而成篇一篇之所編不可  
以多也故其文之多者或析而為二或析而為三以  
便於習讀析而為二者則於篇名之下加上下二字  
以別若禮記曲禮檀弓雜記孟子梁惠王公孫丑等

篇是也析而為三者則有上中下之別如經所載太甲盤庚說命泰誓是也其所以析之為二為三者本於簡冊之繁多其勢不可合而為一故出於不得已而然也至於後世既以紙易簡冊則其一篇所載足以容古者百餘簡之所書而世之文人不悟夫古人分篇之意獨有泥於簡冊之制者如柳子厚時令等篇皆分為上下篇李翱之復性書分為上中下篇皆是泥於古制不達夫時變者惟韓退之之制作未嘗

如此觀其原性等書雖有長短不同而皆別立篇名  
各盡其意而已未嘗離為上下以泥古制此皆得體  
可以為後世屬文之法也史之分篇為三有分而為  
上中下者若太甲盤庚說命泰誓是也有不分為上  
中下而以篇名為別者若皋陶矢厥謨禹成厥功帝  
舜申之作大禹皋陶謨益稷成湯既沒太甲元年伊  
尹作伊訓肆命徂后成王既伐管叔蔡叔以殷餘民  
封康叔作康誥酒誥梓材據此皆以序而有三篇亦

可以分為上中下而但以篇名為別者此蓋出於一時史官各自以其意題其簡編以為別異耳非有深義於其間也此篇名以太甲者唐孔氏曰伊訓肆命徂后與此三篇及咸有一德皆是伊尹戒太甲不可同名伊訓故隨事立稱以太甲名篇此說是也此篇亦是訓之體不可以名伊訓故別之曰太甲史記載太甲篇序以為太甲訓三篇意者漢之時此篇名猶有訓字而後世失之也然而太史公父子皆未嘗見

孔壁中書此篇在孔壁二十五篇之內是乃孔安國所傳遭巫蠱事而不出者也太史公既未嘗見古文故於殷本紀但總篇序之言而臆度之是以全與此篇內不合其說以謂太甲既立三年不明暴虐不遵湯法亂德於是伊尹放之於桐宮三年伊尹攝政當國以朝諸侯三年太甲悔過改善於是伊尹乃迎太甲歸于亳而立之太甲修德諸侯咸服百姓以寧伊尹嘉之遂作訓太甲三篇以褒太甲據經之所載乃

是自太甲不惠阿衡以至於營于桐宮而歸于亳史  
官述其本末之詳非是伊尹之嘉太甲而作是篇也  
中篇曰惟三祀十有二月朔伊尹以冕服奉鬯王歸  
于亳則其所以不明者惟在於即位數月內耳故至  
於終喪則已悔過自艾而被冕服以歸于亳太史公  
乃謂既立三年不明暴虐亂德於是伊尹放于桐宮  
其說皆與經文不同蓋未嘗真見古文尚書而妄為  
之說班孟堅於孔安國傳又謂安國為諫議大夫授

都尉朝而司馬遷亦從安國問故遷書載堯曲禹貢  
洪範微子金縢諸篇多古文夫遷實未嘗見古文書  
其史記所序惟伏生書耳而孟堅乃以謂其多載此  
又孟堅之失也

太甲既立不明伊尹放諸桐三年復歸于亳思庸

謂太甲既立數月不用伊尹之言不明居喪之禮也  
桐宮湯之葬地也太甲既背伊尹之訓不可以言語  
口舌爭矣於是使之往居墓側加之以放逐之名致



之於憂患之地以作其憤悱之意至於三年喪服已  
畢而能悔過遷善克終允德於是自桐宮復歸于亳  
而思用伊尹之言也故曰三年復歸于亳思庸自始  
立至於放而復歸伊尹每進言以戒之史序其事以  
作太甲三篇雖實史官之所序而其所言則皆伊尹  
之言故推本其言所自出而曰伊尹作太甲三篇首  
尾序述以盡出於伊尹之手也

伊尹作太甲三篇太甲惟嗣王不惠于阿衡

伊訓肆命徂后太甲三篇咸有一德皆是太甲末年  
商史所錄故其敘述先後本末相屬成文若史家本  
紀之所載也但其簡冊繁重故分而為七耳惟嗣王  
不惠于阿衡此文勢與上篇伊訓肆命徂后相屬蓋  
自太甲之立伊尹所以丁寧嗣王激切論興亡禍福  
之理以告戒之者可謂深切著明矣然誨爾諄諄聽  
我藐藐曾無從順之意也其下流之性所以陷溺其  
心者深故言雖切而未易入也伊尹自湯伐桀之時

既為相矣及太甲既立實以冢宰總百官其曰阿衡者尊之之稱也猶周以太公為尚父齊以管仲為仲父也高宗命傅說其稱伊尹曰昔先王保衡作我先王保衡即伊尹也古者大臣居人主之左右輔翊主德者蓋有阿衡之名王莽依放古制建公輔之官甄邯為太保劉歆為少阿甄豐為太阿以是知阿保皆師傅之官尊之之稱也伊尹稱阿衡蓋其一時所以極其推尊之意者其義則無傳焉孔氏曰阿倚衡平

言湯倚而取平王氏云保其國如阿平其國如衡此皆是隨字立義未必得其當時所以命名之旨猶毛氏解尚父曰可尚可父云爾

伊尹作書曰先王顧謨天之明命以承上下神祇社稷宗廟罔不祇肅天監厥德用集大命撫綏萬方

作書者作為簡冊之書以陳其所勸戒之意若後世之章疏也漢世簡冊未變故其以章疏進說於上者以皂囊封之謂之上封事蓋其所由來遠矣楊子曰

捺中心之所欲通諸人之嘯嘯者莫如言著古昔之  
昏昏傳千里之恣恣者莫如書蓋古人之所以宣其  
意者惟書與言爾伊尹明言烈祖之成德訓于王此  
其言也自先王顧謨天之明命以下則其書也漢孔  
氏云顧謂常自在之謨是也唐孔氏曰謨與是古今  
之字異故變文為是也言先王每有所行必視是天  
之明命常目在之以顧為常目在之理固然也至以  
謨為是非之是則又無所據王氏曰謨以言其不違

蘇氏曰以言許人曰謏亦皆是率意而為此說未敢  
以為信詳考經意曰先王顧謏天之明命但謂天之  
明命吉凶善惡皆以類至其福善禍淫若影響之應  
形聲先王知命之可畏也如此故其兢兢業業洋洋  
乎如在其上如在其左右雖一言一動皆不敢忘也  
詩曰敬天之怒無敢戲豫敬天之渝無敢馳驅昊天  
曰明及爾出王昊天曰旦及爾游衍此則顧謏之意  
也惟知其天命之可畏顧謏而不敢忘故上以承于

天神下以承于地祇以至社稷宗廟無不致其祇肅  
蓋其所以事鬼神者出於其嚴恭祇事之誠心而不  
區區於犧牲玉帛之間矣惟其誠意之孚如是故其  
馨香之德感于神明而天監之遂集天命於其身使  
之克夏以有天命而撫綏萬方之民也蓋成湯之所  
以由七十里而有天下其恭則自於寅畏上天之命  
其事則見夫致恭盡禮於祭祀之間洞洞乎屬屬乎  
如弗勝如將失之則其感格于天地鬼神之意受明

命以式九圍非自外至也商道事神明鬼之俗盖出於此此盖成湯之所以詒孫謀以遺後世者故伊尹作書以戒嗣王首及於此也

惟尹躬克左右厥辟宅師肆嗣王丕承基緒惟尹躬先見於西邑夏自周有終相亦惟終其後嗣王罔克有終相亦罔終嗣王戒哉祗爾厥辟辟不辟忝厥祖

惟成湯盡其寅畏兢兢業業之誠以膺上天之所眷命撫綏萬方故我能以左右輔翼之以奄宅此天下



之衆故嗣王得以大承基緒蓋謂非湯之自能克慎厥德則雖伊尹亦無所致其左右之力而嗣王亦無以享其盈成之業也尹伊尹名唐孔氏曰孫武兵書及呂氏春秋皆云伊尹名摯則尹非名也今自稱尹者蓋湯得伊尹正天下故號曰尹人皆呼之為尹故亦以尹自稱禮君前臣名不稱名者古人質直不可以後代之禮約之此說不然伊尹每自稱必曰尹躬則其君前臣名也審矣孫武呂氏春秋之言非所以

為據也前既言成湯自慎其德然後伊尹得以左右之然其義猶未盡也詩曰商鑒不遠在夏后之世其君相之間所以克終與不克終可以為鑒而盡其義也夏都安邑其地在亳之西故謂惟我尹躬見此有夏先世之君自能以忠信而有終故其相亦能克終周忠信也論語曰君子周而不比小人比而不周孔氏曰忠信為周阿黨為比忠信而謂之周者施博士曰作偽者心勞而日拙則當缺露而不周忠信則無

偽矣自能周而無缺此說是也其後世之嗣王謂桀也既不能以忠信自周而有終故相亦不克終蓋相之所以克終者惟係諸君而已君有終則相得其終君罔克終則相亦罔終矣伊尹言此者蓋謂湯之顧謫天命盡其恭敬以事天地社稷宗廟可謂自周有終矣故我得以左右厥辟宅師而有終也今太甲承湯之基緒苟不能以忠信有終則我亦何以克終哉言欲使我能致其克終之效惟在嗣王先能有終而

已故又繼之曰嗣王戒哉言不可以不戒慎也所以  
戒慎者當敬爾為君君不敬其為君則將忝辱爾祖  
矣

王惟庸罔念聞伊尹乃言曰先王昧爽丕顯坐以待旦  
旁求俊彥啓迪後人無越厥命以自覆慎乃儉德惟懷  
永圖若虞機張往省括于度則釋欽厥止率乃祖攸行  
惟朕以懼萬世有辭

孟子曰人不足與適也政不足與間也惟大人為能

格君心之非君仁莫不仁君義莫不義君正莫不正  
一正君而國定矣伊尹作書以戒太甲其反覆所陳  
若此者蓋太甲至於欲敗度縱敗禮殊不以社稷之  
安危為念者其意必以謂伊尹之力足以任天下之  
重吾雖盤樂怠傲然有伊尹在必不至於亡也故伊  
尹為之稱其祖成湯慎德於先然後已得以左右之  
於後夏之先世能以忠信有終則相亦惟終其後嗣  
王不克有終則相亦固終且告以辟不辟忝厥祖蓋

以謂苟不能盡其為君之道則我亦末如之何矣意  
此蓋以格其心之非也漢昭帝薨霍光迎昌邑王賀  
賀亦恃有霍光為之輔佐故其即位以後行淫亂益  
甚凡二十七日而為光所廢其見廢也謂霍光曰聞  
天子有爭臣七人雖無道不失其天下彼蓋以謂我  
雖無道而光猶可恃以不失其天下也太甲之意諒  
亦如此然伊尹之於太甲則為之稱道今古以教誨  
之至於再三而猶不改然後營桐宮而使居之卒至

於克終允德而霍光之於昌邑王直廢之而已烏覩  
所謂格君心之非者哉不格其心之非而遂廢之廢  
之而更立君而田延年以謂是舉也合於伊尹之廢  
太甲光遂信以為誠然光之不學無術也如此孔子  
曰惟上智與下愚不移蓋上智不可移而為愚若堯  
舜之不可與為惡是也下愚不可移而為智若桀紂  
之不可與為善是也苟智而未至於上智愚而未至  
於下愚皆可移也故智者而與之為惡則將移而為

惡愚者而與之為善則將移而為智此則謂中人之性以其可上而可下也太甲實中人之性也伊尹知其性之可移而為智故諄諄然以誨之則冀其改過以遷善然其所性雖可移而未易移也故誨之諄諄聽我藐藐而有類夫下愚之不移者蓋由其所陷溺者深故其移之為難惟其有可移之理而移之為難是雖終於克終允德而其始也則猶罔念聞於伊尹之言也薛氏曰王惟庸者王當思而用之也罔念聞



者心不是念耳不是聽也王雖罔念聞而伊尹所以繩愆糾繆格其非心之意不可以已也故於是又申前之義以謂先王所以授我以遺孤之託凡欲使我以道德仁義輔導爾子孫而已今至於欲敗度縱敗禮則是我之所以輔翼者不至而負乃祖所以寄託之意為罪大矣故為之詳陳所以祗厥辟之義其言寬而不迫遜而不怒優游饜飫以入之也昧晦也爽明也昧爽者或晦或明也或晦而或明未旦之時也

言先王於未旦之時大明其德正心誠意養其平日之氣以待平明出而聽朝也其所以孜孜汲汲不遑寧處者無他惟欲旁求俊彥之士以啓迪爾後世之子孫而已蓋古之所謂託六尺之孤者非特扶持其位使之不傾而已必使之成就其德正之直之輔之翼之以格其非心使之知創業之艱難念守文之不易而為成德之主斯無負於寄託矣如太甲成王皆中材之主伊周受託於湯武而相之皆能使其德之

成就而為一代之顯王蓋湯武之所以託之者如此而伊周所以不負其所託者亦以此至於後世所謂受遺託孤者則不復論其德之如何惟冀其位之不失而已如霍光諸葛孔明世皆以伊周許之予嘗觀此二人者其忠義之心誠無負於國家社稷其視曹孟德司馬懿輩欺人孤兒寡婦而奪之位譬如霄壤之殊而較於伊周之事則非二子之所及也何則不能啓迪其主之德以格其君心之非使為成德之主

而徒屑意於事為之末則僅能使其位之不傾而已  
故伊尹論其所以授寄託於先王者則以啓迪後人  
為言蓋所以成就爾太甲之德者是湯之所以望於  
我也湯之所以望於我以啓迪後人者其任固專於  
伊尹而曰旁求俊彥者以見湯之立賢無方其所賴  
以啓迪者衆也惟伊尹與其一時之俊彥咸以啓迪  
為任而今也太甲欲敗度縱敗禮誨之諄諄聽我藐  
藐則是將隕越厥命以自取覆亡雖有俊彥亦末如

之何矣欲無越厥命以自取覆者則在於求其所以  
自顛覆之道而反諸其本故曰慎乃儉德惟懷永圖  
此蓋所以啓迪之也秦為宮室之麗起咸陽而西離  
宮三百鐘鼓帷帳不移而具而其後世曾不得聚廬  
而託處為馳道之麗東窮燕齊南極吳楚隱以金椎  
樹以青松而其後世曾不得蓬顆以蔽冢而託葬自  
古人君侈靡之極者無如秦而亂亡之速子孫無置  
錫之地亦莫若秦蓋奢侈敗亡之徵也禹卑宮室菲

飲食惡衣服豈故為是儉陋而已哉誠知夫懷永圖者必自夫慎乃儉德故也太甲欲敗度縱敗禮盖已昧夫所謂永圖矣苟其駸駸焉日入於奢侈而不知反則至於越厥命以自覆亦豈難哉故所以格其非心而反之於善者則蔽以一言謂欲懷永圖必自夫慎乃儉德可謂切中其疾夫人臣之進諫於君如醫者之用藥惟其切中所受病之處苟為以寒益寒以熱益熱則是促人之死而已如漢之武帝可謂窮奢

極侈而不知紀極矣而董仲舒對策於其時以謂儉  
非聖人之中制者此則與夫公孫弘所謂人主病不  
廣大人臣病不節儉者無以異也議者論仲舒之策  
緩而不切以此言觀之則其言豈非緩而不切也哉  
慎乃儉德惟懷永圖言之於太甲縱欲之時可謂不  
費辭矣能懷永圖以慎乃儉德則神全氣定不為外  
物之所變遷其心安然而不撓然後可以泛應萬機  
之務而無有過舉矣故繼之曰若虞機張往省括于

度則釋此言應物之審也機弩牙也括矢括也度其所準望蓋正鵠也弩之發者在機矢之所中者在括苟能虞機而張之省括于度而釋之使機必應于括括必應于度則百發而百中苟此三者差之於毫釐之間則失之者在尋丈之外矣揚子曰修身以為弓矯思以為矢立義以為的奠而後發發必中矣其立意正與此同所謂奠而後發者則虞機省括之謂也夫其應物之審如此故能欽厥止以率乃祖攸行夫



為人子孫者孰不欲率其祖之所行苟使應物不審而不能敬其所止則其心蕩然無所適從而小人之善紛更者得以進其嘗試之說於是變亂先王之政刑至於小大而天下始大亂矣伊尹之告太甲其序如此者蓋太甲之不明也由其不惠于阿衡故至於欲敗度縱敗禮由其縱欲以敗度禮故至於顛覆湯之典刑是以其啓迪之也首告以先王所以旁求俊彥遺爾後人次又告以儉德之為可永圖末遂告之

以欽厥止率乃祖之攸行蓋其所以繩愆糾繆格其  
非心者不可不推本其所以然者也王能如此則我  
伊尹之心乃可以喜悅其無負先王之所寄託而至  
於萬世猶有辭也有辭蓋謂為萬世之所稱也是所  
謂相亦惟終者也苟使嗣君終不能改過自艾則越  
厥命以自覆而商之社稷遂不復存則相亦罔終矣  
尚何至於萬世有辭也哉

王未克變伊尹曰茲乃不義習與性成予弗狎于弗順

營于桐宮密邇先王其訓無俾世迷王徂桐宮居憂克終允德

伊尹雖丁寧懇切如此而王猶安於不善未能變也故伊尹以謂此乃習於不義之事且將失其所固有之性而淪於惡習且將與性俱成於惡矣夫苟其所固有之善猶有存者則其所以諄諄以誨之者如此之深切著明豈不少悟而知所愧恥者哉今也曾是莫聽安其危而樂其所以亡者則是不義之習殆將

成其性若其固有者矣豈復可以言語而動之哉故  
當此時可以勢動而不可以理聽也故惟使之弗狎  
習于弗順之事而放僻邪侈之習皆無因而至前則  
其外馳之心息矣而又有以動其哀戚之情而作其  
愧恥之意是以孝敬之心油然而生矣雖不暇諄諄  
而誨之而其反於善也盖有不期然而然矣故曰予  
弗狎于弗順營于桐宮密邇先王其訓無俾世迷盖  
於是營之於成湯之墓側而使居之以密邇先王而

思其訓無使終迷而不反也墟墓之間未施哀於民而民哀既奪其所嗜好之習而致之於哀戚易感之地放遠小人之黨擇賢俊而與之居彼其至於自怨自艾處仁遷義蓋理之必然也王於是而往桐宮而居憂卒能思念其祖而終其信德也孟子曰教亦多術矣予不屑之教誨者是亦教誨之而已矣蓋君子之教人有如時雨化之者有成德者有達材者有答問者有私淑艾者若夫道之而弗從誘之而不達而

君子猶不忍棄也而私以善淑之使之憤悱啓發入於善而不自知此不屑之教誨也王制論先王之教民其不帥教者命國之右鄉移之左左鄉移之右不變移之郊又不變移之遂又不變然後屏之遠方終身不齒此皆不忍絕之於自棄之域而私以善淑之蓋所謂不屑之教也伊尹之於太甲誨之諄諄聽我藐藐度其不可以教也則營諸桐宮而使居焉以感動其憂戚之心終以克終允德非不屑之教而何然

而以其不屑教之而其名曰放者蓋其所以欲敗度縱  
敗禮道之而弗從誘之而弗達者彼以為伊尹受成  
湯寄託之重以天下為己任我雖無道而有伊尹必  
不至於亡也其所見如此非有以摧折激勵以生其  
憂患之心則若存若亡終不可得而正也故其遷之  
於桐宮命之曰放蓋示以將廢而不得立彼知其將  
不得立也於是憤悻而反於善此其所以為教也然  
則使太甲而終不改則奈何是亦廢之而已蓋其遷

於桐宮也既處之於人情天理之極以觀之矣於人情天理之極而不知自反焉是無所可望也已古之人將知人君之德必於其哀戚之所感動者而觀之當哀戚而不哀戚豈復可以君天下乎魯襄公卒欲立公子稠穆叔不欲曰是人也居喪而不哀在感而有嘉容是謂不度不度之人鮮不為患武子不聽卒立之比及葬三易衰衰衽如故衰而昭公卒以不終漢成帝為太子中山哀王薨太子前弔元帝感悲不



能自止而太子殊不哀元帝大恨曰安有人不慈仁  
可奉宗廟為民父母乎而成帝卒為漢室基禍之主  
盖人情天理之極苟為有人之心者則宜於此焉變  
矣於是而不變尚何望焉使太甲居桐宮遭放黜而  
憤悻哀戚之心不由是而感發則雖與天下共廢之  
可也惟其困於心衡於慮而後改作也故終有天下  
為商太宗天下萬世仰其德之無數是放之之效也  
世徒知伊尹之放其君而不求其所以放之之意則

是伊尹不免於慙德而亂臣賊子亦將以之為口實  
矣故孟子發明其心以貽天下後世曰有伊尹之志  
則可無伊尹之志則寡也此言簡而盡矣

太甲中

商書

惟三祀十有二月朔伊尹以冕服奉鬯王歸于亳

曾子曰慎終追遠民德歸厚矣先王之所以制為喪  
祭之禮豈苟為是文飾而已哉蓋以孝慈之心人皆  
有之民之所以生厚者其本在於此故先王之制禮

使民知喪以慎終祭以追遠事死如事生事亡如事存以反其所謂孝慈之本苟其心之所固有者油然而生則自能歸厚矣太甲即位之初殷樂怠傲不明居喪之禮伊尹推本其心術之所蔽惟其孝慈之心不篤故至於是遂乃營桐宮之地使之往居焉蓋使之慎終追遠以生其孝慈之心而反之於忠厚也彼太甲之性既非下愚之不移而一旦去其殷樂怠傲之習寢苦塊吸粥面深墨以居始雖出於勉強不得

已而為之及其久也則其固有之性發於哀戚之間  
殆有不期然而然者故及其終喪也則既能處仁遷  
義非復昔日之太甲矣故伊尹於是迎之以歸當是  
時也以天時言之則適當夫三年之喪畢冢宰之攝  
國事至是而可以歸政以人事言之則太甲徂桐宮  
居憂密邇先王其訓至是而亦可以即政矣伊尹可  
以歸政太甲可以即政天時人事於是而合此所以  
順天人之望而迎之以歸也太甲以元年十一月居

仲士之喪至此三年十二月朔蓋二十五朔祥禫之祭已畢於前月至是則可以變凶而即吉矣故伊尹以吉服奉之以歸于亳也周官司服王之吉服祀昊天上帝則服大裘而冕祀五帝亦如之享先王則衮冕享先公饗射則鷩冕祀四望山川則毳冕祭社稷五祀則希冕祭羣小祀則玄冕六冕冕皆有服其服皆玄衣纁裳此但云冕服不言其冕之名漢孔氏但以冕為冠亦無明說唐孔氏云天子六冕大裘之冕

祭天尚質弁師惟掌五冕備物盡文惟袞冕耳此蓋袞冕之服義或然也以冕服奉嗣王歸于亳蓋於是除喪即位而始踐天子之位也

作書曰民非后罔克胥匡以生后非民罔以辟四方皇天眷佑有商俾嗣王克終厥德實萬世無疆之休

王之歸亳蓋喜其能處仁遷義而不墜成湯之業也於是作為簡冊之書以稱美之曰民非君則無能相胥正以生不能相胥正以生則亂矣君非民則無以

君四方無以君四方則亡矣言君民之勢相待以存也夏之民惟其遭桀之亂不能相正以生故相率而去以就湯而君之湯以民之歸之故遂以君四方而有天下蓋民之情至於亂而無以正之則固擇夫能正之者以為君之而賴之以君四方矣太甲之始不明厥德斯民已擇其所以能正之者而君之若去桀而從湯矣當是時雖伊尹亦末如之何也故太甲之不明於初是乃取亂亡之道也有可以取亂亡之道

而卒能處仁遷義以念成湯之訓此豈人力之所能  
為哉蓋以皇天之於商家眷顧佑助之不使成湯之  
業再傳而遂亡也故天誘其衷於冥冥之中使嗣王  
克終厥德則民所賴以生者不失其正之之望矣民  
不失其所望我商家之所以君四方者又可以保之  
而不失矣是誠萬世無彊之休美也夫太甲之所以  
能終厥德者是誠伊尹之力也蓋非營桐宮而使居  
之致之於哀感之地加之以放逐之名以作其憤悱



之志則太甲亦終為下流之歸而已而其所以奉之歸毫作書以序其意乃以為皇天眷佑有商俾嗣王克終厥德雖實一時謙抑之意然君子能致人於悔過遷善之地而不能必其人有悔過遷善之心伊尹之始事湯蓋嘗五就桀矣豈非以夫民所賴之胥正以生者在桀將欲使之遷善悔過而不失其所以辟四方之道乎其所以事桀者雖不得而盡見然以夫所以成就太甲之德者而觀之則其於桀五就之而

不厭所以使之遷善遠罪者必已盡其道矣而桀之  
下愚終無自怨自艾之意故伊尹不得已相湯而伐  
之今也太甲乃能聽其訓已之言而克終允德非天  
之眷佑有商疇克爾哉竊謂天之於人其吉凶禍福  
之間若未嘗有切切然與於其間者然而要其所終  
而究其成則實未嘗有錙銖之差積善之家必有多  
慶積不善之家必有多殃成湯之孫宜其餘慶之所  
鍾無有不善者而太甲為之孫秦始皇之後宜其餘

殃之所逮無有令淑之人而扶蘇為之子太甲為之  
孫宜商祚遂至於亡矣然而成湯以寬仁之德伐夏  
弔民以有天下其善之所積者厚矣豈應一再傳而  
遂亡哉故雖太甲欲敗度縱敗禮而終克終允德以  
守成湯之業此無他以湯之社稷有必存之理則雖  
太甲為之孫而終不亡也扶蘇之仁厚而為秦始皇  
之子則秦若可以存矣然始皇虐用其民以殘虐嗜  
殺而得天下其不善之所積者厚矣苟使扶蘇立則

秦未可以遽亡也故始皇崩於沙丘而扶蘇卒以得罪重之以二世之暴戾而秦遂以滅此天實以秦之社稷有必亡之理則扶蘇為之子而終亦不得存也論至於此則是天地報應之理雖若眇忽茫昧而不可曉及要其極致而究其所以然則不啻若影響之應形聲可不戒哉

王拜手稽首曰予小子不明于德自底不類欲敗度縱敗禮以速戾于厥躬天作孽猶可違自作孽不可逭既

往背師保之訓弗克于厥初尚賴匡救之德圖惟厥終  
拜手首至手也稽首首至地也既首至手乃復申頭  
以至於地欽之至也臣之於君則有此禮太甲之於  
伊尹而拜手稽首者盡欽於師保故其禮如此蜀先  
主軟後主曰汝與丞相從事事之如父太甲拜手稽  
首於伊尹是亦事之如父也非其事之如父則其放  
之也安得不怒其復之也安得而不憾彼商人之見  
其或廢或立皆在其掌握亦安得而不疑也哉太甲

既拜手稽首矣於是悔謝前過而述其自怨自艾之意以謂予小子不明于己之德喪其固有之良心而自致於不類不類猶不肖蓋謂喪其德而失人道之正也詩曰克明克類惟克明然後能克類既不明于德所以自底不類也惟其自底不類故欲敗度縱敗禮以速戾于厥躬王氏曰欲而無以節之則敗度縱而無以操之則敗禮欲而無以節之謂廣其宮室侈其衣服之類縱而無以操之謂惰其志氣弛其言貌

之類此說比先儒為長要之多欲者必縱肆縱肆者必多欲不類之人必有此二者之失故其至於敗度敗禮而不自反則召罪戾於其身也速戾于厥躬蓋指放于桐宮之事也孽災也違遁皆逃避也天作孽謂已無以致之而其災出於天之所作者蓋無妄之災也此則可以違避若乃欲敗度縱敗禮則是自作之災孽也其召戾于厥躬必矣此則不可逃矣孟子曰不仁者可與言哉安其危而利其菑樂其所以亡

者不仁而可與言則何亡國敗家之有夫人必自侮而後人侮之家必自毀而後人毀之國必自伐而後人伐之遂引此言為證蓋為國家者苟有畏危亡之心常思兢兢業業以維持之而我無以致危亡之道則雖有天作之災吾猶可恐懼脩省而避之苟其咎自我作安其危而利其菑樂其所以亡者於是自取之而已其危亡之至豈可得而逃哉孟子之言所以申明太甲之意以諭後世也太甲云我之所以速戾



于厥躬者蓋自作之咎既往者背違師保之教訓不能脩德於其初矣尚有賴於伊尹正救之德圖謀其終以逭夫自作之孽也蓋於是始知伊尹之忠而望其啓沃即序所謂思庸者也夫伊尹云太甲克終厥德蓋以謂皇天眷佑有商之所致至太甲言其不明則曰天作孽猶可違自作孽不可逭不以其所不明者歸之於天何也莫之為而為者天也莫之致而至者命也古之人所為非其力之所能致者然後歸之

於無可奈何而委分於天如伊尹之於太甲能言烈  
祖之成德以訓之至於不改又諄諄而誥戒之至於  
又不改則營桐宮而居之其所以自盡者能如是而  
已矣至於克終允德則非伊尹之所能必也而太甲  
遂能克終允德豈非天乎若夫太甲之自底不類欲  
敗度縱敗禮實自為也豈莫之為而為之者哉實自  
致也豈莫之致而至之者哉故其孽皆自作之孽而  
不可以歸於天也如以自作之孽而歸之於天則人

事廢矣西伯既戡黎祖伊恐奔告于受曰天既訖我  
殷命格人元龜罔敢知吉故天棄我不有康食不虞  
天性不廸率典而紂答之曰嗚呼我生不有命在天  
祖伊反曰嗚呼乃罪多參在上乃能責命于天殷之  
即喪指乃功不無戮于爾邦夫祖伊言天之命而紂  
亦言天命祖伊乃以為紂責命于天而深陳其不可  
者蓋命非人主之所言也安危存亡之勢皆於已取  
之而已矣苟為責命于天而謂已無預乎事則無復

有悔過遷善之心矣若夫人臣之於君雖在我者能盡夫為臣之道而從與不從在夫君從之則安且治不從則危且亂從與不從之間而治亂安危分焉非已之所能必也伊尹之言太甲從之者天也祖伊之言紂不從之者亦天也故二子可以言天若太甲與紂不可以言天矣太甲以為自作孽遂終厥德紂以為我生不有命在天故至於亡學者觀諸此則可以知天命之所自出矣

伊尹拜手稽首曰修厥身允德協于下惟明后先王子  
惠困窮民服厥命罔有不悅並其有邦厥鄰乃曰僕我  
后后來無罰王懋乃德視乃厥祖無時豫怠奉先思孝  
接下思恭視遠惟明聽德惟聰朕承王之休無斁

伊尹於是而盡敬於太甲拜手稽首以致其言而又  
陳其所以告戒之意也孟子曰惻隱之心人皆有之  
羞惡之心人皆有之是非之心人皆有之辭遜之心  
人皆有之凡有四端於我者知皆擴而充之若火之

始然泉之始達苟能充之足以保四海苟不充之不  
足以事父母人有仁義禮智也豈以獨善其一身而  
已哉其心擴而充之使其四端之充實輝光發見於  
外使四海之人咸受其賜然後為能盡其性之所固  
有此古聖人之治天下所以始於致知格物正心誠  
意以修其身矣而遂舉斯心以加諸彼至於家齊國  
治而天下平也太甲之居於桐宮既能自怨自艾處  
仁遷義以聽伊尹之訓已其於欲敗度縱敗禮以速

戾于厥躬者亦已悔而不復為矣於是伊尹以冕服  
奉之以歸于亳始踐天子之位於是時也既能處仁  
遷義則是既以伊尹之訓正心誠意以修厥身而成  
其允德矣故在夫以其仁義禮智之實擴而充之使  
天下咸受其賜然後為能盡為君之道是以伊尹於  
其始踐位既言君之與民其勢相須以生蓋其為皇  
天之所眷佑克終允德以為萬世無疆之休矣於是  
又欲善推其所為以惠及斯民也故遂告之曰人君

之正心誠意以修厥身必使允行之德協于羣下之心然後可以為明后也蘇氏曰允德信有德也下之協從從其非偽者蓋欲天下中心悅而誠服苟非其德出於固有之誠心未有能至者既言其理之如是於是又以祖成湯之允德所以協于下者發明其意而盡其義也孟子曰人皆有不忍人之心先王有不忍人之心斯有不忍人之政以不忍人之心行不忍人之政治天下可運於掌上蓋先王之治天下所以



能使天下中心悅而誠服者無他惟其不忍人之政  
出於不忍人之心而已其愛養百姓之心惟恐一夫  
之失其所視民之有困窮而無告者哀矜惻隱若已  
實致之於困窮之地者故其愛惠之心也若子然既  
視之若子矣豈有不能盡其所以撫字鞠育之道哉  
故困窮之民先王之所以受天命之本於困窮而能  
子惠之則其深仁厚澤無所不被蓋可見矣惟其子  
惠及於困窮則斯民信其有愛人利物之心矣故服

其命令而罔有不悅也罔有不悅則欲以為君矣故當時與湯同為諸侯者皆鄰並而有邦矣湯所有者惟亳之民以湯為君者亦惟亳之民今也湯之德惠及困窮故鄰國之民非湯之所有者亦皆以湯為君而望其來曰俟我后后來無罰蓋是時諸侯之邦皆化於桀之虐政峻法以荼毒斯民民墜塗炭不獲保其生而湯之在亳獨以仁政至於困窮之民無不被其澤者其深仁厚澤雖其所施者未出於亳邑而其

惻怛愛民之意已固結於天下故鄰國之僕之也曰  
我后之來其無刑罰也必矣此其所謂允德協于下  
者也予竊以謂孟子之游諸侯大率用此意蓋是時  
諸侯皆以暴虐為政非使民以攻戰則厚賦斂以虐  
之嚴刑罰以脅之孟子之意以謂今之諸侯苟有行  
仁政者則諸侯之為暴虐者皆為之驅民而歸之矣  
故曰今天下之人牧未有不嗜殺人者如有不嗜  
殺人者則天下之民皆引領而望之矣又曰彼奪其

農時使不得耕耨以養其父母父母凍餓兄弟妻子  
離散彼陷溺其民王往而征之夫誰與王敵又曰信  
能行此五者則鄰國之民仰之若父母矣率其子弟  
攻其父母自生民以來未有能濟者也夫凡此皆伊  
尹所謂並其有邦厥鄰乃曰俟我后后來無罰之意  
也惟湯之子惠困窮而其允德協于下其見於已然  
之效者如此今也太甲繼之既能處仁遷義克終允  
德矣將欲擴而充之使民服厥命罔有不悅亦如成

湯之時豈有他哉惟在勉之而已故繼之曰王懋乃德視乃厥祖無時豫怠謂惟其不豫怠以勉其德則至於成湯亦不難也湯之盤銘曰苟日新日日新又日新湯之所以懋其德者其新之又新也如此豈有一時之豫怠也哉故欲懋乃德則當視乃祖之所以又日新者無時豫怠則其德愈崇而民無不被其澤矣奉先思孝接下思恭視遠惟明聽德惟聰此又告之以懋乃德之實也為湯之子孫而欲懋其德以子

惠困窮使民服厥命罔有不悅苟非孝恭以立本聰  
明以致用其安能使其民被其澤哉故其上承祖宗  
之託則其奉之也不可不思孝下膺臣民之歸則其  
接之也不可不思恭奉先思孝則能懋乃德視乃厥  
祖無時豫怠矣接下思恭則能子惠困窮使民服厥  
命罔有不悅矣然人君以眇然之身處於九重之上  
垂旒蔽明黜黜塞聰而欲盡知四方情偽以子惠其  
困窮非其聰明足以察見人情之好惡則其聞見止

於耳目所接之地而已故又在夫明足以視遠聰足以聽德然後為盡明曰視遠聰曰聽德者唐孔氏曰視戒見近迷遠故言視遠聽戒背正從邪故曰聽德各準其事相配為文此說是也而未若林子和之說為善子和云高其目所視者遠然後可以為明下其耳所聽者德然後可以為聰此蓋言聰明之用其所施者有不同故也既能孝恭以立本聰明以致用則為君之道盡矣其能擴而充之者斯可以協于下矣

伊尹之所以望太甲者既得之矣故終之曰朕承王之休無數言我承王之休美無有厭數者也

太甲下

商書

伊尹申誥于王曰嗚呼惟天無親克敬惟親民罔常懷懷于有仁鬼神無常享享于克誠天位艱哉德惟治否德亂與治同道罔不興與亂同事罔不亡終始慎厥與惟明明后

申重也伊尹於是重誥于王以盡其所以警戒之意



蓋優游饜飫欲其入之深而不背也書之六體典謨  
訓誥誓命之文雖曰其體有六亦無截然為謨為訓  
為誓為命之理蓋其體亦有相參混者如太甲三篇  
與伊訓皆是伊尹訓太甲言蓋皆訓體也而此篇曰  
伊尹申誥于王則訓之與誥義亦相通蓋此二字亦  
皆是有所警戒之意無逸曰古之人猶胥訓誥則是  
二字之義蓋不相遠學者於此尤不可以穿鑿通之  
也嗚呼者歎而發其辭也古人有言曰善亦何常師

之有蹈之則為君子違之則為小人惟善與不善之  
無常也故太甲始也欲敗度縱敗禮以速戾于厥躬  
可謂其心為小人之歸矣而其一且幡然而改則遂  
能克終允德以聽伊尹之訓已此有以見其不善之  
無常也然雖幡然改於不善而徙夫善而其中人易  
流之性常為放僻邪侈之所變遷安能保其終不至  
於棄其善以從於不善也故伊尹懼夫善之無常也  
則為之稱道夫天人神鬼所以禍福吉凶向背之際

惟在善不善之間蓋所以警動其恐懼修省之意而欲成其克終之善也惟天無親民罔常懷鬼神無常享蓋言天之所親民之所懷鬼神之所享皆無常也其所以無常者蓋有德則親之懷之享之無德則不親不懷不享矣故曰克敬惟親懷于有仁享于克誠蓋謂惟有德則可常也敬仁誠皆是有德之名但變其文耳惟天與鬼神之所親享民之所懷其無常也如此則人君所處之天位可謂難矣其所以難者蓋

有德則治否德則亂故也所以德惟治者以與治同道罔不興故也所以否德則亂者以與亂同事罔不亡故也治曰同道亂曰同事言治之難而亂之易也蘇氏曰堯舜讓而帝子噲讓而絕湯武行仁政而王宋襄行仁義而亡與治同事未必興也必同道而後興道同者事未必同也周厲王弭謗秦始皇禁偶語周景王鑄大泉王莽作泉貨紂積鉅橋之粟隋煬帝洛口諸倉其事同其道無不同者故與亂同事無不

亡矣此說為盡大抵伊尹之誨太甲每告之以成之甚難而壞之甚易故始之所訓者則謂爾惟德罔小萬邦惟慶爾惟不德罔大墜厥宗至此又曰與治同道罔不興與亂同事罔不亡欲與治同道非大德不可也苟與亂同事以不德之小者足以墜厥宗矣此皆伊尹至忠之訓也夫與治同道則興與之之難也如此與亂同事則亡亡之之易也如此將欲同其所以治之之道而不同其所以亂之之事者無他惟在

謹其所與之人而已所與者君子固與治同道矣所與者小人則與亂同事矣能終始之際謹其所與君子而不使小人得以乘間而進惟是明明之主明明者明之至也

先王惟時懋敬厥德克配上帝今王嗣有令緒尚監茲哉若升高必自下若陟遐必自邇

荀子曰治生乎君子亂生乎小人自古治亂之所生必自夫君子小人進退之間然人主即政之始銳意

於治則往往多用君子及其享富貴之日久驕縱之心日生而忘其禍亂之機故每至於用小人小人既用則天下由是亂矣蓋始用君子而卒用小人者此中材庸主之通患也故其國家亦皆始治而終亂且以唐室觀之高宗始與長孫無忌褚遂良則治終與李義府許敬宗則亂明皇始與姚宋則治終與李林甫楊國忠則亂德宗始與崔祐甫則治終與裴延齡盧杞則亂憲宗始與杜黃裳裴度則治終與皇甫鎛

程異則亂此數主者始終之際其用君子小人相反  
如此而治亂之應亦如影響之不差則是安危存亡  
之機果在此而不在彼也太甲雖能自怨自艾處仁  
遷義以聽伊尹之訓已然而亦安能保其終不與小  
人以及於亂天下者哉夫以堯舜之聖聰明睿智出  
於天縱其不惑於小人也必矣然猶且憂驩兜遷有  
苗畏巧言令色孔壬況如太甲中材之主也伊尹論  
君子小人之無常治亂之難易而總結之曰終始慎



厥與惟明明后使太甲知夫安危存亡之本以克慎厥終古所謂一言而興邦者此類之謂也伊尹既論天人向背之理與夫治亂難易之勢以致其所以誥戒之意然猶未足以盡其義也又稱夫其祖成湯知夫天之所親民之所懷鬼神之所享不可常也有德而與治同道則治無德而與亂同事則亡治亂興亡之際如此其不可恃也故於是勉敬其德德日新日日新又日新以慎其所與於終始之際無時豫怠是

以自七十里興而伐夏弔民以有天下創業垂統貽  
子孫萬世之法為商家之太祖克配上帝之祀也孝  
經曰昔者周公郊祀后稷以配天宗祀文王於明堂  
以配上帝古者祭昊天上帝必以其祖考之肇造基  
業者為之配蓋所以極其尊嚴之道而盡其孝敬之  
儀周之祀明堂以文王配則商之祀以成湯配蓋可  
知也此曰克配上帝蓋是指其廟為太祖而克配食  
於上帝之祀也必言其克配上帝者蓋創業之君其

德至於配食上帝之祀則是其始終之際懋敬厥德者至是而成矣賈誼陳治安之策謂大數既得則天下順治海內之氣清和咸理生為明帝沒為明神名譽之美垂於無窮禮祖有功而宗有德使顧成之廟稱為太宗上配太祖與漢亡極大抵論人主之盛德必至於鴻名熙號與天地宗廟之祀相為無窮然後為至未至於是則天之所親民之所懷鬼神之所享猶未敢自必其有常也惟湯之所以兢兢業業克終

厥德也如此而太甲繼其有令善之緒當夙夜庶幾  
監視此成湯之所以懋敬者率而行之夫繼世而有  
天下莫不承祖考之緒然有若仲康之世所承者太  
康之緒宣王之世所承者厲王之緒則其欲大有為  
於天下必也有所變更移易而治功不可以遽成太  
甲之所承者湯之緒可謂善矣嗣有善緒則其舉而  
措之天下無難矣長卿曰軌迹夷易易遵也湛恩厯  
洪易豐也憲度著明易則也垂統理順易繼也是以

業隆於襁褓而崇冠乎二后蓋謂成王因文王之令緒故其成德如此其易也太甲之繼成湯亦若是而已矣故為太甲者夫復何為哉惟監成湯之德以盡其持盈守成之志則何施而不可哉自此而下於是丁寧反覆告之以嗣守成湯之令緒持盈守成之道也夫成湯之所以懋敬厥德至於克配上帝者夫豈於一日之間襲而取之哉蓋由其明夫物之本末事之終始而知所先後故其德日新日日新又日新而

至於是也故伊尹欲太甲之監於成湯之懋敬厥德則首告之以若升高必自下若陟遐必自邇蓋以夫人之所以升高陟遐者喻修德者之不可以無漸也夫自下而升於高自邇而陟于遐皆由其跬步而積之積跬步而不已極其所如往而無跬步之闕焉然後能至末有不積跬步而能至者故中庸論君子之道亦以謂譬如行遠必自邇譬如登高必自卑蓋進德修業之喻未有如此之切者成湯之懋敬厥德所

以銘於盤盂之上以爲朝夕之監戒而曰德日新日  
日新又日新誠知夫所以自修之道如升高陟遐然  
雖跬步不可廢也故太甲欲率乃祖之攸行亦惟見  
於躬行之實明夫先後本末始終之序如自下而升  
高自邇而陟遐不可以陵節躐等而無其序也

無輕民事惟難無安厥位惟危慎終于始有言逆于汝  
心必求諸道有言遜于汝志必求諸非道嗚呼弗慮胡  
獲弗爲胡成一人元良萬邦以貞君罔以辯言亂舊政

臣罔以寵利居成功邦其永孚于休

夫既以懋敬厥德如升高陟遐之不可以無漸然則其所當先者果何事哉下焉為億兆之所倚賴一有輕之之心則乖離之釁生矣故必難之而後可難之者深思遠慮惟恐一夫之失其所也上焉為祖宗之所付託一有安之之心則亂亡之機兆矣故必危之而後可危之者戒慎恐懼如臨深淵如履薄冰惟恐有一朝之患也無輕民事惟難則民事日益修無安



厥位唯危則天位日益安矣夫人君所以懋敬厥德  
自其始而慎之以至於終不越夫此二者而已故繼  
之曰慎終于始言欲謹其終必於其始謹之始之不  
克謹終亦無可見之效矣如升高者必自下而慎之  
如陟遐者必自邇而慎之不慎其自下自邇而能至  
於高與遐者未之有也然自古人君之治天下處於  
持盈守成之世亦莫不欲重民事保天位以終始其  
德然往往或至於忽民事而不念以危其位則有始

而無終者無他繼體守成之君生於深宮之中長於婦人之手未嘗知憂未嘗知危未嘗知哀未嘗知懼處富貴之極不知下民之疾苦雖自力於為善而至於享逸樂之久海內治安上恬下嬉廓然無事則往往好人之順已而惡人之逆已於是諂諛之言日進而忠鯁之義不聞此民事之所以日忘而天位之所以日危而德之所以不終也如唐明皇即位姚宋為相姚善應變以成天下之務宋善守文以持天下之

正遂成開元之治及其太平日久一惑於聲色玩好  
盡忘其平日好賢樂善之心於是張九齡以忠直見  
疎而李林甫楊國忠以諂佞獲用一旦漁陽竊發四  
海橫流而猶不悟觀其與裴士淹論宰相賢否至宋  
璟曰彼賣直以取容耳彼宋璟者乃明皇初年賴其  
忠直以致太平者也至其狎習於小人遜志之言而  
逆耳之諫久不接於耳也則指之為賣直而不自知  
嗚呼明皇未足道也以唐太宗之英睿蓋天錫之勇

智而又躬冒矢石跋履艱難以有天下然至其治定  
功成之後其從善納諫之心亦寢以陵替故魏鄭公  
曰陛下貞觀之初導人使諫三年以後見諫者悅而  
從之比三年強勉受諫而終不平也夫始也導人使  
諫是惟恐人之不逆其志也及其強勉受諫而終不  
平則是欲人之遜其志矣此實溺於宴安之習無敵  
國外患以儆其寅畏之心則其好人之順已而惡人  
之逆已者是人情之常也而非魏鄭公日陳其不克

終之漸以類戒之則其至於追咎忠諫之人以為賣  
直取名如明皇天寶之亂亦不難也太甲之居於桐  
宮困於心衡於慮而作也雖既能處仁遷義以聽伊  
尹之訓已而伊尹懼其安於逸樂之久則或至於好  
人之順已惡人之逆已以寢不克終故告之以慎終  
于始矣又繼之曰有言逆于汝心必求諸道有言遜  
于汝志必求諸非道此蓋告之以聽言之道也有言  
逆于汝心是拂耳之言也拂耳之言不可以逆已而

遂怒之必以其言而求諸道使其言果合於道則固  
忠直之言也雖逆耳而當從之也有言遜于汝志是  
順耳之言也順耳之言不可以從已而遂喜之必以  
其言而求諸非道果非道則固諂諛之言也雖順耳  
而當拒之也逆順之際不徇吾好惡之情而一斷之  
於道則君子得以伸其忠小人無所容其姦矣此終  
始謹厥與之要漸也然言之逆順必以道而求之苟  
其心不斷然知夫道與非道之為異則或至於以道

為非道而以非道為道矣欲知道與非道之異而不惑於是非則奈何亦不過乎慎思之力行之而已故伊尹於是又歎其難而曰弗慮則不獲蓋欲其深思之也弗為則不成欲其力行之也慎思力行則慮而獲矣為而成矣此一人所以元良也元良言其大也一人大善則知道與非道之別故逆耳之言不可以情拒之順耳之言不可以情受之如此則君子在位而小人不得容其讒佞於其間此萬邦所以正也孟

子曰君仁莫不仁君義莫不義君正莫不正一正君而國定矣一人元良萬邦以正之謂也至於一人元良萬邦以正則伊尹之所以期望於太甲者盡於此矣彼太甲能事斯言躬行以懋敬厥德而慎之於終始之際則能灼知君子小人之情狀而浸潤之譖膚受之愬必不得行彼小人之類進其嘗試之說以變亂先王之政刑者將無隙而入矣故終之以君罔以辯言亂舊政言先王之舊政可以為萬世常行之道



惟小人之辯言為能亂之君不信辯言則舊政不亂矣太甲能不以辯言亂舊政則離師傅而弗反矣故伊尹得以遂其功成身退之志不以寵利居成功而引身告老以歸也君罔以辯言亂舊政則君之道得矣臣罔以寵利居成功則臣之道得矣君臣各得其道則我商家可以保其永久之年信有休美于無窮矣自古膺受遺託孤之任其進退之際可謂至難矣蓋其德之可以託六尺之孤必也耆年宿德為一世

之老成人然後可以服天下之心故其至於功成事  
定也以其年齒論之則可以告老而歸而以事勢觀  
之則或未可以遽去者蓋為幼主者類多血氣未定  
趨舍未堅苟其德未能至於離師傅而弗反而吾則  
引身以去使小人得以乘隙而進則將至於辯言亂  
舊政而貽四方之禍矣故召公不悅周公之留輔成  
王而周公反覆再三言其所以不得不留之意者則  
其勢未可以去則亦不得以罷利居成功為嫌也太

甲之自桐宮而歸也既能處仁遷義以克終允德矣  
而其當時內外協德無有異心上則無管蔡流言下  
則無頑民之不率教者伊尹之心度其必能終始謹  
厥與不以辯言亂舊政也故諄復明告以堅其心於  
申誥之時而遂示其所以引身求退之意蓋如是而  
不能引身而去則為以寵利居成功矣昔霍光受武  
帝寄託輔翼少主昭帝即位方年十四而其時又有  
上官蓋燕之徒懷異志而窺伺神器當此之時不可

一日而無光也故方其不引身而去於昭帝之時其  
義為得至於宣帝之立年已長矣其聰明慈仁足以  
獨當萬機之勢而守高皇之業光可以歸政矣而猶  
執其權者累年寵盛勢極卒成族滅之禍予嘗以為  
光在昭帝之時是周召之勢也在宣帝之時伊尹之  
勢也伊尹不以寵利居成功而光居之所以為不學  
無術也

尚書全解卷十六

欽定四庫全書

經部

尚書全解卷十七

詳校官給事中臣李臺

通政使司副使臣莫瞻菴覆勘

覆校官編修臣汪鏞

校對官監丞臣張曾炳

謄錄監生臣李錦

欽定四庫全書

尚書全解卷十七

宋 林之奇 撰

咸有一德

商書

伊尹作咸有一德咸有一德

此篇蓋伊尹致政告老而歸訓于太甲丁寧告戒終致其拳拳愛君之意而作也而其簡冊所編次則與伊訓太甲三篇相連屬不可以無別也故別為篇名

曰咸有一德蓋其篇中有曰惟尹躬暨湯咸有一德故借此四字以為簡冊之別然此篇之義不必全繫於是也漢孔氏曰言君臣皆有純一之德唐孔氏曰伊尹致仕而退恐太甲德不純一作此篇以戒之經言惟尹躬暨湯咸有一德言已之君臣皆有純一之德戒太甲使君臣亦然此主太甲而言臣有一德者欲令太甲亦任一德之臣經言任官惟賢材左右惟其人是戒太甲使善用臣也詳考此篇終始之義信



如二孔之說蓋此篇之意實欲太甲慎於用臣君臣  
上下克終厥德以盡其純一之德然書之篇名以篇  
中字為簡冊之別者多矣如梓材無逸立政之類不  
必皆盡其一篇之義要之姑借此字以為篇名之別  
焉若必從而為之說則妄妄有穿鑿而不得通者且  
以詩譬之如召旻之詩其篇言旻天疾威天篤降喪  
而篇終曰昔者有如召公曰闢國百里取其始終之  
美遂以召旻二字為此篇之名乃若詩之義不在是

也而作序者乃曰是閔也閔天下無如召公之臣也若此之類皆妄論也百篇之序蓋有述所作之人而不言其所以作是篇之意者如答單作明居周公作立政與此篇之序比之諸序最為簡省若以為經文已明故略之然其諸序亦有經文已明而序文詳言之者故予嘗謂書序之作非出於一人之手蓋歷代史官相傳以為書之總目既非出於一人之手故自有詳略不同至於書之本義不在是也如此篇發首

是言伊尹復政厥辟將告歸乃陳戒于德則其序亦  
可言其致政告歸之意然當時史官所錄者止如此  
若杜預所謂史有文質辭有詳略不必泥也學者於  
此不可校量同異而爲之說苟以書序之作盡出於  
夫子之手必於其間校量同異輕重盡以春秋褒貶  
而求之則將不勝其鑿矣

伊尹既復政厥辟將告歸乃陳戒于德

太甲既終喪伊尹以冕服奉之于桐宮以歸于亳始

踐天子之位故伊尹於是還政太甲告老而歸蓋功  
成名立則奉身而退不以寵利而居成功也夫豪傑  
之士蓋亦有可以當受遺託孤之寄者然至於天下  
之權在於掌握則往往固吝而不肯舍者有以爲騎  
虎而不得下之勢者如霍光之忠義蓋所謂可以託  
六尺之孤臨大節而不可奪者然而寵盛勢尊則固  
惜權柄不肯還政於宣帝而積其疑似之釁卒成族  
滅之禍此猶可言也至於曹操司馬懿桓溫之徒則

又往往肆其不軌之心欺孤兒寡婦而奪之位此無  
他惟其既執天下之大權而不忍棄去故其末流不  
害于其家則凶于其國其禍如此之慘也伊尹以冕  
服奉嗣王而歸既復政而遂告歸而去豈復以權勢  
繫吝其心哉孟子曰非其義也非其道也一介不以  
與人一介不以取諸人彼其視千駟之多天下之大  
無以異於一介之取與則眇然天下曾何足以動其  
心哉此其盛德大業所以歷萬世而不可企及者也

伊尹雖告老而歸然太甲欲敗度縱敗禮蓋嘗習於下流而爲放僻邪侈之事其居桐宮也困心衡慮然後改過遷善之心作於憂患之中其於處仁遷義蓋未久也而遂處至尊之勢躬攬萬幾之務伊尹度其所養也固所守也確必可以離師傅而弗反然其告歸本出於愛君之誠心拳拳然而不能自己也於是爲之歷陳天人影響之應所以禍福興亡之理以堅其修德之志其言尤爲懇到切至蓋其所以望於太

甲以克終允德而爲商家社稷無疆之休者其言實  
基於此使太甲優游饜飫入於其心而不背也故伊  
尹得遂其高尚之志遠處於不用之地而無憂故曰  
將告歸乃陳戒于德蓋陳其德之常與不常以致夫  
禍福興亡之理者以戒之也

曰嗚呼天難諶命靡常常厥德保厥位厥德靡常九有  
以亡

嗚呼者歎而發其辭也蓋言之不足故嗟嘆之也諶

者信也天之難信者以其禍福興亡之命初無常也  
治或變而爲亂安或變而爲危當其既安且治矣而  
遂信其無復有危亂則凶禍隨之矣蓋天命之無常  
惟其德則可以爲常有能常厥德則其治可以永保  
蓋人之德有常則天命亦有常而可信苟其德之不  
常則雖奄有九有之衆亦不救於亡蓋人之德既無  
常則天命亦無常而不可信矣如以舜繼堯以禹繼  
舜天下大安大治者幾二百年此非天命之有常也



蓋堯舜禹三聖人皆有常德故天命亦從而有常苟使以丹朱繼堯以商均繼舜其德既不常則天命亦將不常矣故人君之德常與不常是天命之所自出也惟天命之所自出是以惟人主不可以言命使人主而言命則將以天命爲可信而常厥德保厥位者廢矣九有即九州也夏商周皆是用禹貢疆理之法分天下以爲九域夏之九州即禹貢所載是也商之九州先儒以爲即文觀之即成周之九州職方氏之

所載者也

夏王弗克庸德慢神虐民皇天弗保監于萬方啓迪有  
命眷求一德俾作神主惟尹躬暨湯咸有一德克享天  
心受天明命以有九有之師爰革夏正

伊尹既言天命之無常惟有德則可常於是當引夫  
桀之所以失天下湯之所以得天下者以證之矣夏  
王桀不能常其德幽則慢於神明則虐於民彼所以  
慢神虐民者其意蓋謂天命之可信如紂所謂我生

不有命在天也既慢之虐之矣於是民怨神怒皇天  
雖欲眷有夏而存之不可得也故於是棄之而弗保  
天既棄桀而弗保然而天下不可以無主也故鑒視  
萬方之衆擇其能有天命者而開導之於是眷求其  
一德之人俾爲天地神祇之主矣而我商家君臣咸  
有純一之德故能上當天心於是受天之明命以有  
九州之衆革夏正而有天下也革夏正者夏以建寅  
之月爲正湯既勝夏始以建丑之月爲正是革正之

事前世未嘗有蓋始於湯武王因之遂以建子之月  
爲正易之革曰湯武革命順乎天而應乎人是也而  
說者乃以爲正朔三而改自古相變謂夏以前迭用  
此說非是某於堯典已詳論之矣伊尹既於上言天  
難謀命靡常惟有德可以爲常於是遂言桀之所以  
失天下湯之所以得天下者蓋天之所以不保於桀  
者是桀之弗克庸德自不能保也自緯候之書出於  
漢世祥瑞之說雜然而起儒者爭言三代受命之符

使爲人主者不知取必於其德而妄意符命於不可測之間使王莽因之而篡漢者推其源流皆漢儒之罪也孔氏生於漢世其於經也蓋有不淪於諸儒之習而卓然有超世之見其論伊尹成湯咸有一德克享天心受天明命是其一也故其說以謂所征無敵謂之受天命夫漢儒之論往往以謂帝王之興必有非人力之所能致而自至者符瑞之說不勝其煩孔氏不然以謂湯之所以受天明命者惟所征無敵耳

至於東面而征西夷怨南面而征北狄怨曰奚獨後  
予後來其蘇是則人心之無所不服人心既服天命  
其在是矣唐孔氏亦識其意遂從而發明之曰天道  
遠人道邇天之命人非有言辭之告正以神明佑之  
使之所征無敵謂之受天命也緯候之書乃稱有黃  
龍元龜白魚赤雀負圖銜書以授聖人正典無其事  
也若漢孔氏可謂不畔於經矣若唐孔氏亦可謂無  
負於先儒矣

非天私我有商惟天佑于一德非商求于下民惟民歸于一德德惟一動罔不吉德二三動罔不凶惟吉凶不僭在人惟天降災祥在德

此又申前之意以盡其義也言湯之所以受天明命者非天之私我商家也惟天之所助佑者在于一德故天佑之也其所以有九有之師者非商之求于下民也惟民之所歸者在于一德我有一德故民歸之也我商家所以天佑之民歸之者以其德之一故動

罔不吉也蓋德之一則是吉德也以吉德而動豈有  
不吉者哉桀之所以天不佑之而民不歸之者以其  
德之二三而動罔不凶也蓋德之二三則是凶德也  
以凶德而動豈有不凶者哉惟其動之吉凶皆繫於  
德之一與其二三故繼之曰惟吉凶不僭在人惟天  
降災祥在德言天之吉凶所以不僭差於人者則天  
之所降災祥惟在於德故也自其降於天者而言之  
則爲災祥自其受於人者而言之則爲吉凶其實一



也伊尹自篇首至於此丁寧反覆如此之詳如此之盡而其大要則惟言天命之不可常惟有德則可以爲常人事之得失動於此則天命之從違應於彼不可不謹也既曰常德又曰一德者惟一故常惟常故一天地之覆載日月之照臨四時之推遷萬物之生育所以悠久而不變者惟其一而常常而一故也故伊尹告歸其言及於一德常德尤爲詳盡者蓋以謂常人之立事無不銳於始而工於初至於中則稍怠

末乃澶漫而不振此雖聰明睿智之主有所不能免者且以周宣王觀之當其側身修行任賢使能見於雲漢烝民江漢六月采芑之詩固已無愧於文武成康矣惟其盛德之高明光大也如此故能復受天命以中興周室而復會諸侯於東都非其聰明睿智之有以過人者豈能爾哉及其憂勤之志弛於庭燎好賢之心替於鳴鶴迨其末年遂至不藉千畝料民太原而寢不克終繼以幽王之暴虐平王之孱弱而周

室自此衰矣此無他惟其德之不常不一故也故太  
甲雖能處仁遷義於憂患之餘而伊尹以冕服奉之  
以踐天子位及其告歸而去也則懼其歷年寢久遂  
至于豫怠澶漫而不振也故其言丁寧反覆以堅其  
心謂德之可常而天命之不可常也苟其德之不常  
則天命亦不常矣故其言之丁寧反覆如是之切至  
也善乎蘇黃門之論陸贄也其言曰贄始以官從事  
德宗老而爲宰相從之出奔而與之反國彌縫其闕

而濟其危比其反也功業定矣而卒斃于裴延齡之手其故何哉孔子曰南人有言曰人而無常不可以作巫醫善夫不常其德或承之羞贄以有常之德事德宗之無常以巫醫之明而治無常之疾是以承其羞耳又曰德宗常持無常之心故前勇而後怯贄常持有常之心故勇怯各得其當然其君臣之間異同至此欲其上下相保不可得矣夫以德宗之爲人也既非常德一德則雖以陸贄之賢事之卒至於君臣

上下不能相保伊尹雖以一德爲太甲之師傅然苟使太甲之德至於不常而不一則雖伊尹在朝亦末如之何也已而況於告歸而去乎故其將去也丁寧告戒出於愛君懇切之誠而不能自己也

今嗣王新服厥命惟新厥德終始惟一時乃日新任官惟賢材左右惟其人

伊尹前既論天命之無常惟有德則可以爲常德之得失動於此則天之禍福吉凶應於彼其於天人相

與之際反覆推明可謂曲盡其理矣於是致其拳拳之忠所以期望於太甲者以終其義也方太甲宅憂亮陰百官總已以聽冢宰也其萬幾之務皆伊尹之所剴裁當此之時天下之治亂社稷之安危伊尹實任之是以太甲之初雖欲敗度縱敗禮自肆於宮禁之中而其禍不及於百姓者以伊尹實當天下之憂責也今太甲既能克終厥德還自桐宮以踐天子之位伊尹於是復政厥辟告歸而去不復以庶政自關

而太甲於是親萬幾之務矣既已親萬幾之務則其  
一言一動而安危治亂之機於此而萌矣伊尹既以  
其身之所自任者歸之於太甲有不可不盡其丁寧  
告戒之意故謂今嗣王新服厥命聿新厥德言新有  
事於萬幾之務言而作命實四方萬姓之所觀聽也  
人君即位之初發號施令所以端本正始而新天下  
之耳目尤不可不謹也高宗亮陰三祀百官總已以  
聽冢宰及其免喪而踐天子之位也且恭默不言羣

臣進諫于王曰天子惟君萬邦百官承式王言惟作  
命不言臣下罔攸稟令而高宗以謂以台正于四方  
台恐德弗類茲故弗言蓋謂始有言于天下苟爲輕  
動而妄發後雖悔之亦何及矣故其新服厥命將欲  
發號施令爲天下之所取信者惟在于日新厥德德  
者日就月將學有緝熙于光明是也故繼之曰終始  
惟一時乃日新言始乎如是終亦如是終始惟在于  
一德而無造次顛沛之或違是乃其德日新之道也



蘇氏曰中有所主之謂一中有主則物至而應物至而應則日新矣中無主則物爲宰凡喜怒哀樂皆物也而誰使新之如衆人之言新則不能一而非日新也而伊尹曰一所以新也是謂萬物並育而不相害道並行而不相悖又曰聖人如天時殺時生君子如水因物賦形天不違仁水不失平惟一故新惟新故一一故不流新故無數此言盡之矣終始惟一時乃日新蓋所以總結上文常厥德保厥位德惟一動罔

不言之義也爲人君者亦莫不欲終始惟一則日新其德然每每至於寢不克終者蓋未嘗不以小人得以乘間而進熒惑人主之心術蠱害其德日滋月益則流入于敗亡而不自知故大臣之事君既有以格君心之非而成就其德又當使之舉賢材而用之使賢材既用於朝不能間之以小人則其日新之德蓋將有加而無已也是以伊尹之告歸尤丁寧懇切於此既曰終始惟一時乃日新而又戒之曰任官惟賢

材左右惟其人漢孔氏曰官賢材而任之非賢材不可任選左右必忠良不忠良非其人原孔氏之意以謂任賢材充位列職自大臣至於百執事是也居是官者必得賢材而用然後無瘕官無曠職任官者既得賢材皆在王之左右所謂侍御僕從綴衣虎賁趣馬小尹之任又不可不選忠良之人而用之不忠良則是左右之非其人也蓋賢材雖已任官苟左右之非其人縱有賢材亦將見陷於浸潤之譖膚受之愬

而不得一施矣孔氏之言雖簡而其旨明說者不悟其意遂以左右爲大臣謂左右者如說命曰王置諸左右謂惟其人者如周官曰官不必備惟其人此雖有所據而云然與上文任官惟賢材文勢不相應既曰任官惟賢材則大臣已在其中矣而又加左右於下豈不贅哉此蓋未嘗攷先儒之意而妄爲是說也自古賢材既居于位矣而天子左右或非其人則其勢不兩立小人必勝君子必退至於不能自存者多

矣有宏恭石顯在于左右則周堪蕭望之之賢材無所施矣有曹節侯覽在于左右則陳蕃李膺之賢材無所施矣有仇士良陳洪志在于左右則裴度之賢材無所施矣欲賢材之任官而得其忠非左右惟其人不可也

臣爲上爲德爲下爲民其難其慎惟和惟一

此兩句說者不同漢孔氏曰言臣奉上布德順下訓民唐孔氏遂謂爲上謂奉爲在上爲德謂布爲道德

順下謂卑順以爲臣下訓民謂以善道訓助下民顧氏亦同此說故陸德明釋文曰以爲上爲民爲于僞反爲德爲下如字夫爲上與爲下相對爲文而爲上則于僞反爲下則如字又爲德與爲民相對爲文而爲德則如字爲民則于僞反文勢同而意訓特異必無此理是知先儒之說不可從蘇氏曰臣之所以爲民上者非爲爵祿也爲德也德非位則不行其所以爲我下者非爲爵祿也爲民也王氏曰所謂爲上爲

德者將順正救爲其上造成所以爲君之德所謂爲下爲民者先後相勸爲其下造成所以爲民之行也如蘇氏之言爲下爲民則通以爲上爲德言臣之所以爲民上則經文並無爲民上之意如王氏爲上爲德則通而以爲下爲民言爲其下造成其爲民之行所以爲民之行則經文但有德字無行字是知此說皆不通某妄謂此四字皆當音于僞反蓋伊尹既言任官惟其人不可以小人在於人主之左右使君子

無所效其能而未足以盡其義也故又言賢材之人  
惟人君之有德則可以致其輔相之力苟人君無其  
德雖有賢材亦末如之何也已若民則無所擇也蓋  
世有不可與有爲之君而無不可治之民臣欲爲上  
非其君之有德則不可得而爲之也至於民則何所  
不可哉惟君有可有不可而民則無所不可也故不  
曰爲上爲君而曰爲上爲德也臣之爲上既在於君  
之有德苟其君之無德則雖得賢材而用之必爲小



人之所排擊沮難而不能自存故繼之曰其難其慎  
惟和惟一言爲君必如此而後可也其難其慎者言  
當疏遠小人憂之畏之惟恐有得乘其隙而進也惟  
和惟一者言當親近君子與之協心同德以大有爲  
於天下也能如此則其德日新而臣之欲爲上爲德  
者無不得其志矣

德無常師主善爲師善無常主協于克一俾萬姓咸曰  
大哉王言又曰一哉王心克綏先王之祿永底烝民之

生

此又戒之以并謀兼智合以爲公無偏黨也德無常  
師者言欲日新其德故無一定之師凡主於善者皆  
在所師也善亦無一定之主苟協于克一而可以成  
就吾之常德者皆在所主也孟子曰大舜有大焉善  
與人同舍己從人樂取諸人以爲善中庸曰舜其大  
智也與舜好問而好察邇言隱惡而揚善執其兩端  
用其中於民其斯以爲舜乎此有以見其德之無常

師而善之無常主也苟使德有常師善有常主則其  
心必有所繫吝而不爲公心有所繫吝而不公則小  
人得以窺伺其意之所在以迎合其意而投其所好  
如此則偏聽而不能并謀兼智與天下爲公而民之  
不服者多矣如唐明皇始用姚崇兼容天下之善以  
致開元太平之始及其惑於聲色則私心漸勝於是  
舉國家之務而信一李林甫專恣朝政者十有八年  
至於末年諫諍路絕上下之情不通及其一旦盜發

幽陵四海橫流唐遂陵遲不可復振此無他一有偏  
聽則天下之不服者衆矣故伊尹既戒太甲小人之  
不可用而又推原其所謂用小人者自夫君之心不  
能合并以爲公故彼乘隙而入也苟能德無常師善  
無常主樂與人爲善以與天下爲公而私意小智不  
撓於其間則天下其有不心悅而誠服者哉故其發  
號施令則萬姓皆曰大哉王言又曰一哉王心蓋由  
其言之大則見其心之一也蓋德無常師善無常主

則其心公而不私不私故其心一其心一則其言不期大而自大苟其心有繫吝之私於方寸之間紛然殽亂莫適爲主雖諄諄然告人以其心之一而人愈不信矣德至於萬姓咸曰大哉王言又曰一哉王心則其德高明盛大無以復加矣故上焉則可以綏先王之寵祿而下焉可以永底烝民之生育矣

嗚呼七世之廟可以觀德萬夫之長可以觀政后非民罔使民非后罔事無自廣以狹人匹夫匹婦不獲自盡

民主罔與成厥功

伊尹所以訓告太甲者諄復懇到盡於此矣於是咨嗟而申之以終其意也七世之廟天子之廟也三昭三穆與太祖之廟爲七也此商書也言七世之廟則天子七廟其來尚矣而鄭氏云周制七廟者太祖及文王武王二祧與親廟四太祖后稷也商則六廟契及湯與二昭二穆而已此蓋妄爲之說其實三代皆事七廟也萬夫之長者猶所謂萬姓萬民亦謂天子

也非德無以遺後非政無以齊衆伊尹之言此者謂  
非德之可觀則無爲萬夫之長太甲既上事七世之  
廟下爲萬夫之長必其德政有可觀者然後可也季  
武子曰諸侯來魯於是乎觀禮與此觀同林子和曰  
觀者有以示於此而彼得以見之之謂也其意以謂  
太甲有七世之廟可以示其德於下爲萬夫之長可  
以示其政於下言其勢之易也案此說則觀字當從  
去聲讀與易觀卦之象同其說亦通夫欲德與政皆

有可觀於下則必有道矣惟不以民之至愚而忽之盡其所以敬民之道無一夫之不獲者德與政將不可勝其用矣故繼之曰后非民罔使民非后罔事匹夫匹婦不獲自盡民主罔與成厥功蓋言君之勢相湏而立后使民而民事后蓋其尊卑之分不得不然也若謂后之可以使民遂以至尊之勢而驕之則將自廣以狹人矣若以民之勢爲在於事上遂以至卑之勢而虐之則匹夫匹婦將不獲自盡矣爲上者既



自廣以狹人爲下者將不獲自盡則君民之心離矣  
茲誠治亂安危之本也故終篇尤深切於此以謂太  
甲欲善其德與政則當克自抑畏其視天下愚夫愚  
婦一能勝予而盡其欽民之道無自以爲廣而謂人  
爲狹苟使四海之廣萬民之衆而有一夫一婦不獲  
自盡則是人君之心有所未盡故彼亦不得以自盡  
也有一夫一婦不獲自盡則乖戾之心生而天地陰  
陽之氣亦將乖戾而不和矣其何以成厥功哉是以

人主之職必在夫得萬國之驩心以事其先王使萬  
姓咸曰大哉王言又曰一哉王心然後爲能盡其心  
此庸德一德所以克終也至於厥德靡常而致九有  
之亡者亦豈在天也哉失匹夫匹婦之心則天下之  
心自此去矣故太甲論德無常師主善爲師善無常  
主協于克一而必以萬姓爲言至於無自廣以狹人  
則但曰匹夫匹婦不獲自盡民主罔與成厥功亦猶  
其所謂爾惟德罔小萬邦惟慶爾惟不德罔大墜厥

宗詳考此篇終始之義又與召誥之言曾無少異召  
誥曰我不敢知曰有夏服天命惟有歷年我不敢知  
曰不其延惟不敬厥德乃早墜厥命即此篇所謂天  
難諶命靡常常厥德保厥位厥德靡常九有以亡也  
召誥曰今王嗣受厥命我亦惟茲二國命嗣若功王  
乃初服嗚呼若生子罔不在厥初生自貽哲命即此  
篇所謂今嗣王新服厥命惟新厥德也召誥曰其惟  
王勿以小民淫用非彝至欲王以小民受天永命即

此篇所謂后非民罔使民非后罔事無自廣以狹人  
匹夫匹婦不獲自盡民主罔與成厥功也蓋太甲成  
王皆是始踐尊位而攬萬幾之務故伊尹召公諄諄  
告戒之言若合符契其大意則皆以謂天命不可必  
而人事爲可必不可以廢人事而不修而歸諸天命  
也夫中才庸主其所以偃然自肆於民上而不以國  
之安危休戚爲意者惟其恃天命而廢人事故每至  
於敗亡而不自知唐德宗與李泌論建中之亂曰建

中之亂術士豫請城奉天此蓋天命非用盧杞所能致也夫德宗怠棄厥德用盧杞以致禍亂至於鑿輿播遷生民塗炭若可以少悟矣而猶歸咎於天可謂愚矣故李泌曰命者他人尚可言惟君相造命者若言命則禮樂刑政皆無所用矣泌之言誠與咸有一德召誥合伊尹之相太甲召公之相成王不以天命歸於自然之數而謂本於人君之德與不德者蓋謂君相造命不可以言命也伊尹召公之言太甲成王

信而用之故能成商周之治泌之言德宗不能用而  
唐室陵遲其言則同而其治亂則異何也蓋對泌以  
正者泌之所能必也至於用與不用則非泌之所能  
必也

沃丁既葬伊尹于亳咎單遂訓伊尹事作沃丁伊陟相  
太戊亳有祥桑穀共生于朝伊陟贊于巫咸作咸乂四  
篇太戊贊于伊陟作伊陟原命仲丁遷于囂作仲丁河  
亶甲居相作河亶甲祖乙圮于耿作祖乙



尚書全解卷十七